



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-731/02.
Sarajevo, 03. jula 2002.

Z A P I S N I K

sa 28. sjednice Predstavničkog doma Parlamentarne skupštine Bosne i Hercegovine,
održane 03. jula 2002. godine

Sjednica je počela s radom u 11,15 sati. Prisustvovalo je 38 poslanika. Opravdano su odsustvovali Hilmo Neimarlija, Marko Amidžić, Željko Bilbija i Franjo Majdandžić.

Iz Vijeća ministara prisustvovali su ministri Svetozar Mihajlović, Ante Domazet i Krešimir Zubak, te zamjenici ministra Gordana Ković, Milan Lovrić i Nikola Kragulj.

Iz međunarodnih organizacija prisustvovali su J.P. Hoteldahl – OHR, N.Simović – OSCE- Paul Labun i Nermina Kožljak – NDI i Stefan Simosas – Evropska komisija.

Predsjedavajući Mariofil Ljubić dao je uvodne napomena u vezi s prijedlogom dnevnog reda, koji je usaglašen na sjednici Proširenog kolegija.

Povodom prijedloga dnevnog reda diskutovao je Mirko Banjac. On je prigovorio na sve češću praksu da se na Domu razmatraju zakoni po članu 105. Poslovnika, pa je podsjetio da u tom članu piše da se on koristi samo u izuzetnim slučajevima, kad je potrebno donijeti zakon koji zahtjeva izuzetnu hitnost, ili je sadržajno tako jednostavan da nema potrebe provoditi komisijsku fazu. U vezi s tim Kolegiju je postavio pitanja i zatražio obrazloženje zašto se ovako u Domu radi.

Predsjedavajući Ljubić odgovorio je da su u dnevnom redu zakoni koje je proglasio Visoki predstavnik i da oni već funkcionišu, te da je poznata procedura propisana članom 105., da nema mogućnosti podnositi amandmane. Među njima su također zakoni koje je BiH obavezna donijeti kao članica Vijeća Evrope i kao potencijalni kandidat za članstvo u drugim međunarodnim organizacijama, rekao je, pored ostalog, predsjedavajući Ljubić.

Kako nije više bilo prijavljenih diskutanata, predsjedavajući je konstatovao da je za 28. sjednicu usvojen sljedeći

D N E V N I R E D :

1. Poslanička pitanja i odgovori,
2. Zahtjev Vijeća ministara za razmatranje Prijedloga zakona o Ombudsmanu za ljudska prava Bosne i Hercegovine po hitnom postupku (član 105. Poslovnika),
3. Zahtjev Vijeća ministara za razmatranje Prijedloga zakona o državnoj službi u institucijama Bosne i Hercegovine po hitnom postupku (član 105. Poslovnika),
4. Zahtjev Vijeća ministara za razmatranje Prijedloga zakona o pravnoj pomoći u službenoj saradnji u krivičnim stvarima između Bosne i Hercegovine, Republike Srpske i Brčko Distrikta Bosne i Hercegovine po hitnom postupku (član 105. Poslovnika),
5. Zahtjev Vijeća ministara za razmatranje Prijedloga zakona o izmjenama i dopunama Izbornog zakona Bosne i Hercegovine po hitnom postupku (član 105. Poslovnika),
6. Zahtjev za razmatranje Zakona o administrativnim taksama i tarifa administrativnih taksi, po hitnom postupku (član 105. Poslovnika) – predlagač Mariofil Ljubić,
7. Zahtjev za razmatranje Zakona o izmjenama i dopunama Zakona o administrativnim taksama BiH, po hitnom postupku (član 105. Poslovnika) – predlagač Mariofil Ljubić,
8. Zahtjev za razmatranje po hitnom postupku Zakona o Sudu BiH po hitnom postupku (član 105. Poslovnika) – predlagač Mariofil Ljubić,
9. Zahtjev za razmatranje Zakona o izmjenama i dopunama Okvirnog zakona o privatizaciji preduzeća i banaka u Bosni i Hercegovini po hitnom postupku (član 105. Poslovnika) – predlagač Mariofil Ljubić,
10. Zahtjev za razmatranje Zakona o izmjenama i dopunama Zakona o popunjavanju upražnjenog mjesta člana Predsjedništva BiH po hitnom postupku (član 105. Poslovnika) - predlagač Dom naroda.

Ad. – 1 : Poslanička pitanja i odgovori

Na 28. sjednici postavljena su poslanička pitanja kako slijedi:

Boro Bjelobrk:

Prigovorio je što na sjednici nije prisutan predsjedavajući Vijeća ministara, jer bi želio usmeno da mu postavi par pitanja u vezi s zahtjevima koje mu je upućivao.

Kolegiju je prigovorio da je već probio rokove da se potruži kako bi on dobio odgovore na pitanja vezana za trgovinu oružjem i u vezi s nostrifikacijom diploma stečenih na bosanskohercegovačkim univerzitetima.

Bahrija Osmanović:

Ponovo prigovorila što još od Vijeća ministara nije dobila odgovor na pitanje koliko u institucijama BiH ima zaposlenih po ugovoru duže od šest mjeseci?

Sead Buturović:

1. Iznio problem da je položaj djelatnosti koje se finansiraju iz poreza i doprinosa (zdravstvo, školstvo, kultura) znatno različit u pojedinim kantonima na prostoru Federacije, pa i čitave države. Predložio Vijeću ministara da razmisli o mogućnosti da se na nivou države ustanove određeni vidovi solidarnosti kako bi se omogućilo funkcionisanje ovih djelatnosti u približno izjednačenim uslovima.

2. Kada će BiH kao međunarodni subjekt garantovati i ostvariti cjelovitu zaštitu ljudskih prava i osnovnih sloboda?

Muhamed Begović:

U pisanoj formi dostavio pitanje:

Da li će dr Esad Bučuk biti ponovo raspoređen na dužnost u diplomatsku službu obzirom na njegovo već stečeno iskustvo i uspješan dosadašnji rad u diplomatskoj službi?

Ako će ponovo biti raspoređen na istu ili drugu odgovarajuću dužnost, kada se predviđa takav raspored?

Ad. – 2 i 3:

Predstavnički dom je bez diskusije usvojio zahtjev Vijeća ministara za razmatranje po članu 105. zakonskih prijedloga pod 2. i 3. tačkom, a onda je u predloženom tekstu usvojio:

- Zakon o Ombudsmenu za ljudska prava Bosne i Hercegovine – (jednoglasno -prisutno 37 poslanika);
- Zakon o državnoj službi u institucijama Bosne i Hercegovine (od prisutnih 37, ZA glasovalo 36, jedan poslanik nije glasao).

Ad. – 4:

U okviru ove tačke dnevnog reda za riječ se javio Mirko Banjac. Rekao je, pored ostalog, da nije učestvovao u glasanju o prethodnim zakonima iz dva razloga: prvo, što mu Kolegij nije odgovorio na postavljena pitanja i drugo, što u tekstu zakona postoji kršenje Ustava BiH – u prvom zakonu umjesto Vijeće stoji Vlada BiH.

Predsjedavajući Ljubić je odgovorio da ako se radi o tehničkoj grešci ona će se ispraviti. Potom je na glasanje prvo dao zahtjev da se Prijedlog zakona razmatra po hitnom postupku. Zahtjev je usvojen. Potom je Dom, sa 35 glasova ZA – od prisutnih 38, usvojio Zakon o pravnoj pomoći u službenoj saradnji u krivičnim stvarima između Bosne i Hercegovine, Republike Srpske i Brčko Distrikta Bosne i Hercegovine.

Ad. – 5:

Predsjedavajući Ljubić je podsjetio da Dom u okviru 5. tačke treba da razmatra zahtjev Vijeća ministara za razmatranje po članu 105. dva prijedloga za izmjene i dopune Izbornog zakona BiH:

- a) Prijedlog zakona o izmjenama i dopunama Izbornog zakona BiH koji je usvojen na 70. sjednici Vijeća ministara 13.06.2002. (sadrži 18 članova) i
- b) Prijedlog zakona o izmjenama i dopunama Izbornog zakona BiH, koji je usvojen na 72. sjednici Vijeća ministara 27.06.2002. godine. (sadrži 5 članova).

Kako je bilo prigovora od jednog broja da nisu dobili materijal, predsjedavajući je dao pauzu da bi poslanici dobili materijal.

Poslije pauze predsjedavajući je prvo dao na glasanje zahtjev za razmatranje po članu 105. Prijedloga zakona pod **podtačkom a)**.

Zahtjev je usvojen jednoglasno, sa 34 glasa poslanika koji su glasali.

U diskusiji o Prijedlogu ovog zakona učestvovao je Miloš Jovanović. Potom je Dom, sa 33 glasa ZA i 2 suzdržana, usvojio Zakon o izmjenama i dopunama Izbornog zakona BiH naveden pod podtačkom a)

U okviru **podtačke b)** predsjedavajući Kluba SDA Adem Borić rekao je da je Klub SDA na brzinu pročitao Prijedlog zakona i da je zauzeo stav da ga ne bi trebalo razmatrati po hitnom postupku.

Obrazloženje Prijedloga zakona podnio je ministar Svetozar Mihajlović. On je obrazložio odredbe zakona i predložio da se na ovoj sjednici usvoji jer je hitan zbog izbora koji će se održati u mjesecu oktobru tekuće godine.

U diskusiji su učestvovali Adem Borić i Miloš Jovanović, a onda je Dom, sa 23 glasa ZA, 6 protiv i 2 suzdržana – po entitetima, iz FBiH 16, iz RS 8 ZA, usvojio zahtjev da se Prijedlog zakona razmatra po članu 105.

U diskusiji o Prijedlogu zakona učestvovali su Abdurahman Malkić, Sead Buturović, Mirko Banjac i Miro Grabovac.

Na primjedbe iz diskusije odgovorio je ministar Mihajlović. On je skrenuo pažnju da podnošenje amandmana nije moguće s obzirom da se zakon razmatra po članu 105. Primjedbu na stav 2. člana 11.10. u članu 3. Prijedloga zakona, ministar Mihajlović je prihvatio kao tehničku grešku, i predložio da se stav 2. definiše analogno odredbi člana 10.10. ovog prijedloga zakona.

Predstavnički dom je poslije diskusije usvojio Prijedlog zakona o izmjenama i dopunama Izbornog zakona Bosne i Hercegovine, sa ispravkom u članu 3. tako da stav 2. član 11.10. glasi:

“Vijeće naroda se sastoji od 28 delegata – osam (8) iz reda srpskog, osam (8) iz reda bošnjačkog, osam (8) iz reda hrvatskog naroda i četiri (4) iz reda Ostalih.”

ZA zakon su glasala 33 poslanika, 2 su se suzdržala.

Ad. – 6 – 10:

Predstavnički dom je usvojio zahtjev za razmatranje zakona pod ovim tačkama po članu 105, a zatim je usvojio zakone kako slijedi:

- Zakon o administrativnim taksama i tarifa administrativnih taksi, (od prisutnih 37 ZA glasalo 36),
- Zakon o izmjenama i dopunama Zakona o administrativnim taksama BiH, (prisutno 36, ZA glasalo 35),
- Zakon o Sudu Bosne i Hercegovine (od 36 ZA glasalo 31, po entitetima, iz RS ZA 6, iz FBiH 26),
- Zakon o izmjenama i dopunama Okvirnog zakona o privatizaciji preduzeća i banaka u Bosni i Hercegovini (prisutno 37, ZA glasalo 36),
- Zakon o izmjenama i dopunama Zakona o popunjavanju upražnjenog mjesta člana Predsjedništva BiH (prisutno 37, ZA glasalo 35, 2 protiv).

Ovim je završena 28. sjednica.

Sastavni dio ovog zapisnika je transkript 28. sjednice Predstavničkog doma.

S E K R E T A R
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Mariofil Ljubić

